

FRÁSÖGN

af 66. þingi Norðurlandaráðs í Stokkhólmi, 27.–29. október 2014

66. þing Norðurlandaráðs var haldið í Stokkhólmi 27.–29. október sl. Af hálfu Íslandsdeildar Norðurlandaráðs tóku þátt í þinginu Höskuldur Þórhallsson, formaður, Elín Hirst, Guðbjartur Hannesson, Jóhanna María Sigmundsdóttir, Róbert Marshall, Steingrímur J. Sigfússon og Valgerður Gunnarsdóttir, auk Lárusar Valgarðssonar ritara. Helstu mál á dagskrá voru leiðtogafundur norrænna forsætisráðherra og stjórnarleiðtoga, utanríkis-, öryggis- og varnarmál, stjórnsýsluhindranir, loftslags- og umhverfismál og samfélags- og heilbrigðismál.

Leiðtogafundur norrænna forsætisráðherra og stjórnarleiðtoga um norrænt samstarf fjallaði að þessu sinni um Norðurlönd framtíðarinnar, með hliðsjón af menntun, aðlögun og vinnumarkaði. Forsætisráðherra, Sigmundur Davíð Gunnlaugsson, sagði við umræðuna að norrænt samstarf væri ekki síður mikilvægt nú í byrjun 21. aldarinnar en þegar til þess var stofnað í kjölfar síðari heimsstyrjaldarinnar. Það þyrfti þó að nýta betur í framtíðinni til þess að ná sameiginlegum markmiðum í alþjóðlegri samkeppni með því að kynna Norðurlönd sem aðlaðandi markaðssvæði og þá sameiginlegu og jákvæðu ímynd sem hugtakið „Norden“ kallar fram í hugum fólks. Forsætisráðherra fjallaði um þau verkefni sem farið hefur verið af stað með á þessu ári undir formennsku Íslands í Norrænu ráðherranefndinni. Eitt þeirra verkefna var að boða til fundar norrænna ungmenna þar sem saman komu um eitt hundrað ungmenni á aldrinum 16–20 ára til þess að ræða þróun norræns samstarfs og framtíð þess. Þar kom fram að aukið samstarf og jafnvel sameiginlegt menntakerfi, skattkerfi og heilbrigðiskerfi voru unga fólkinu hugleikin, sem er skýrt ákall um kraftmikið norrænt samstarf í framtíðinni.

Í kjölfar leiðtogafundarins kynnti Helle Thorning-Schmidt, forsætisráðherra Danmerkur, formennskuáætlun Danmerkur í Norrænu ráðherranefndinni árið 2015 sem leggur áherslu á vöxt, velferð, gildi og norðurslóðir. Höskuldur Þórhallsson veitti andsvar við formennskuáætluninni fyrir hönd forsætisnefndar Norðurlandaráðs. Hann tók áætluninni vel og sagði hana grundvöll fyrir áframhaldandi góðu starfi ráðherranefndarinnar. Höskuldur sagði einnig að sameiginleg gildi Norðurlandabúa, svo sem lýðræði, tillit til umhverfisins, jafnrétti, nýsköpun og lítil spilling væru mikilvægir styrkleikar og einkenni á alþjóðavettvangi. Gildin væru dýrmæt, bæði til að koma Norðurlöndum á framfæri og líka sem traustur grundvöllur til að vinna að stöðugleika í okkar heimshluta.

Utanríkis-, öryggis- og varnarmál voru mest áberandi málaflokkurinn á Norðurlandaráðsþinginu. Helstu áhersluþættir voru Úkraína, Mið austurlönd og norðurslóðir. Gunnar Bragi Sveinsson utanríkisráðherra flutti skýrslu norrænna utanríkisráðherra í umræðu um alþjóðastjórnsmál. Utanríkisráðherra sagði að norrænu ríkin hefðu á grundvelli þjóðaréttar fordæmt innlimun Rússlands á Krímskaga þar sem sjálfstæði og friðhelgi landamæra Úkraínu yrði að virða ófrávíkjanlega. Norðurlöndin styddu Úkraínu pólitískt, efnahagslega og félagslega sameiginlega og hvert í sínu lagi og í alþjóðastofnunum á borð við Sameinuðu þjóðirnar og Öryggis- og samvinnustofnun Evrópu. Hann sagði að Úkraína þarfnaðist stuðnings Norðurlanda við að koma á nauðsynlegum pólitískum og efnahagslegum umbótum og að þau hefðu lagt áherslu á að virða skuli lýðræðisleg réttindi og meginreglur í samskiptum sínum við úkraínsk stjórnvöld. Gunnar Bragi sagði enn fremur að öll norrænu ríkin hefðu stutt þvingunaraðgerðir Evrópusambandsins (ESB) gagnvart Rússlandi með hliðsjón af grundvallarsjónarmiðum í utanríkis- og varnarmálum, þrátt fyrir mismunandi pólitíska og efnahagslega hagsmuni, og að Norðurlöndin vildu eiga víðtækt og uppbyggilegt samstarf við Rússland, bæði innan Evrópu og í alþjóðasamstarfi, en það væri erfitt við núverandi aðstæður.

Varðandi Mið austurlönd sagði utanríkisráðherra að hryðjuverkasamtökin ISIS væru ógn, ekki aðeins í Sýrlandi, Írak og Mið austurlöndum, heldur um allan heim og að Norðurlöndin

styddu alþjóðlegar aðgerðir gegn þeim. Norðurlöndin styddu baráttuna gegn ISIS með mismunandi hætti en af sömu grundvallarástæðum sem væru að þau gætu ekki staðið hjá þegar þjóðaréttur, mannúðarréttur og mannréttindi væru fótum troðin.

Um norðurslóðir sagði utanríkisráðherra að komið hefði verið upp traustum lagamma fyrir friðsamlegt og traust samstarf á þeim slóðum. Innan Norðurskautsráðsins ætti sér stað samstarf um mikilsverð málefni sem vörðuðu norrænu ríkin, ekki aðeins af sjónarhóli heimskautsins heldur einnig í alþjóðlegu samhengi, t.d. á sviði loftslagsbreytinga og sjálfbærrar nýtingar náttúruauðlinda. Þá sagði Gunnar Bragi að Norðurlöndin legðu einnig áherslu á þátttöku frumbyggja á norðurslóðum og að þarfar þeirra væru hafðar í fyrirrúmi.

Undir umræðunni um alþjóðastjórnsmál var síðan samþykkt ráðherranefndartillaga um nýja samstarfsáætlun um málefni norðurslóða á tímabilinu frá 2015 til 2017.

Utanríkisráðherra fjallaði einnig um þá dýpkun sem átt hefði sér stað í samstarfi Norðurlandanna á vettvangi öryggis- og varnarmála undanfarin ár. Hann rifjaði upp sameiginlega yfirlýsingu norrænu utanríkisráðherrana á fundi þeirra í Reykjavík um að efla og dýpka samstarfið í utanríkis- og öryggismálum, meðal annars með tilliti til áhættustjórnunar, starfsemi innan alþjóðastofnana, loftslagsmála, sjálfbærrar þróunar, heimskautsmála og netöryggismála. Fundur utanríkisráðherranna var í tengslum við að norrænu utanríkis- og varnarmálaráðherrarnir hittust í tilefni þess að Svíþjóð og Finnland tóku í fyrsta sinn þátt í æfingum í tengslum við loftrýmiseftirlit Atlantshafsbandalagsins í lofthelgi Íslands.

Norski varnarmálaráðherrann Ine Marie Eriksen Søreide flutti skýrslu norrænna varnarmálaráðherra í umræðunni um alþjóðastjórnsmál. Hún sagði að framferði Rússlands gegn Úkraínu hefði breytt stöðu öryggismála í Evrópu sem hefði áhrif á tengsl Norðurlanda við Rússland og öryggi á Eystrasaltssvæðinu og nærsvæðum. Samtímis væru efnahagsþrengingar í Evrópu sem drægu fram þörf fyrir endurbætur og nútímavæðingu ríkja í varnarmálum sem og samstarf milli ríkja í þeim málum hvað varðar aukna getu, æfingar og þjálfun, og ekki síst framlag til alþjóðlegra aðgerða.

Søreide sagði að markmið norræna varnarmálasamstarfsins, NORDEFCO – Nordic Defence Cooperation, væri að styrkja og þróa hernaðargetu Norðurlanda og aðgerðahæfni með hagsýnu samstarfi sem einkenndist af sveigjanleika og opnum samskiptum. Síðastliðið ár hafi áhersla verið á öryggismál, bæði á að styrkja NORDEFCO sem samskipta- og samráðsvettvang um viðbragðsáætlanir innan einstakra landa sem og á öryggisáskoranir á alþjóðavettvangi.

Norski varnarmálaráðherrann sagði einnig að með tilkomu svokallaðs Enhanced Opportunities Programme gæfist nú Svíþjóð og Finnlandi kostur á auknu samstarfi við NATO. Þá hefðu þáttaskil orðið samtímis flugeftirliti NATO yfir Íslandi í febrúar sl. þegar Svíþjóð og Finnland hefðu stundað flugæfingar á sama svæði.

Utanríkis- og öryggismál voru einnig til umfjöllunar við fyrstu umræðu um nýjar þingmannatillögur annars vegar og við sérstaka umræðu um öryggismál hins vegar. Tillaga flokkhóps vinstrisósíalista og grænna um að viðurkenna Palestínu sem sjálfstætt ríki varð tilefni til nokkurra umræðna milli fulltrúa norrænu flokkahópanna. Í tillögunni er lagt til að Norðurlandaráð beini tilmælum til norrænu ríkisstjórnanna um í fyrsta lagi að ríkisstjórnirnar í öllum norrænu þjóðþingunum leggi fram tillögu um að þing viðkomandi lands viðurkenni Palestínu sem fullvalda og sjálfstætt ríki og í öðru lagi að Ísraelsmenn og Palestínumenn verði hvattir til – og að fullur stuðningur verði veittur af Norðurlöndum – að stuðla að friði og sáttum með friðarsamningum sem byggjast á alþjóðarétti og samþykktum Sameinuðu þjóðanna, þar á meðal gagnkvæmri viðurkenningu á Ísraelsríki og ríki Palestínumanna. Tillagan fer nú til umfjöllunar í forsætisnefnd.

Thorvald Stoltenberg, höfundur Stoltenberg-skýrslunnar, var gestur við sérstaka umræðu um öryggismál. Stoltenberg sagði að núverandi staða í öryggismálum kallaði eftir nánara norrænu samstarfi um öryggis- og varnarmál. Innlimun Krímskagans hefði skapað óróleika og óskýra mynd af stöðu mála og óskýra mynd af því hvað bæri að gera í stöðunni. Til þess að fá skýrari mynd af þankagangi Pútíns og fylgismanna hans væri gagnlegt að líta til aðdragandans.

Staða mála væri sú, ólíkt því sem var á tímum kalda stríðsins, að mörgum Rússum fyndist upplausn Sovétríkjanna og vandkvæði í Georgíu og Úkraínu lítillækkandi og vildu draga til sín Rússa í nærliggjandi löndum. Til að greina stöðu mála þyrfti því að gera ráð fyrir að langtímamarkmið Pútíns væri að styrkja stöðu Rússlands sem stórveldis á fyrirverandi yfirráðasvæði Sovétríkjanna. Framferði Rússa mætti kalla herskáu afmörkunarstefnu (n. offensiv russisk markeringspolitikk), sem hefði verið greinileg nálægt norrænum flugrýmum og í sænska skerjagarðinum. Norðurlöndin þyrftu að gera ráð fyrir að í þessari herskáu afmörkunarstefnu mundi Rússland sýna styrk sinn og hernaðarmátt gagnvart nágrönnum sínum. Í viðbrögðum Norðurlanda þyrfti að koma fram skýr afstaða sem sýndi að Norðurlöndin eru sjálfstæð og fullvalda ríki og mæta framandi orrustuþotum eins og áður. Staða mála væri þó sú að hvorki væri mögulegt að skapa öryggi í Evrópu án Rússlands né í mótstöðu við Rússland. Norðurlöndin þyrftu því að viðhalda tvíhliða samskiptahefð við Rússland þrátt fyrir svæðisbundnar viðskiptaþvinganir líkt og gert var á tímum kalda stríðsins.

Varðandi norræna samvinnu um öryggis- og varnarmál sagði Stoltenberg að margar af tillögum skýrslu hans hefðu verið framkvæmdar, þeirra mikilvægust um gagnkvæma samstöðuýfirlýsingu. Aðrar væru í farvatninu. Hann sagði að lokum að við núverandi aðstæður þyrftu Norðurlöndin á meiri samstarfi í öryggis- og varnarmálum að halda og lagði til að sett yrði á laggirnar norræn öryggis- og varnarmálanefnd til að leggja mat á hvenær og hvernig tillögurnar yrðu að veruleika. Í þeirri vinnu þyrfti þó alltaf að hafa hugfast að slíkt samstarf kæmi ekki í stað samstarfs í NATO og ESB heldur væri viðbót við það.

Stjórnsýsluhindranir milli Norðurlanda voru á dagskrá þingsins, þar sem Kristina Persson, samstarfsráðherra Svíþjóðar, flutti skýrslu um vinnu gegn þeim og þar sérstaklega starf Stjórnsýsluhindranaráðsins undir formennsku Sivjar Friðleifsdóttur á þessu ári, formennskuári Íslands í Norrænu ráðherranefndinni.

Stjórnsýsluhindranir voru einnig til umfjöllunar við fyrstu umræðu um þingmannatillögur, þar sem flokkahópur miðjumanna lagði fram tillögu um framkvæmd gerða Evrópusambandsins. Í tillögunni er lagt til að Norðurlandaráð beini tilmælum til Norrænu ráðherranefndarinnar um að innleiða þá starfshætti að formennskulandið í Norrænu ráðherranefndinni kanni væntanlega lagagerninga frá ESB og forgangsraði þeim með hliðsjón af því hversu mikil áhrif þeir eru taldir hafa á hreyfanleika á Norðurlöndum og bjóði embættismönnum í ráðuneytum sem fara með framkvæmd þeirra til norræns samráðs um túlkun, ferli og framkvæmd þessara lagagerninga ESB. Tillagan fer nú til umfjöllunar í forsætisnefnd.

Við fyrstu umræðu um þingmannatillögur var einnig fjallað um tillögu þingmanna úr flokkahópum miðjumanna, jafnaðarmanna og vinstriósíalista og grænna um aðgerðir til að vinna áfram með hugmyndina um norrænt sambandsríki. Tillagan skóp nokkrar umræður milli fulltrúa flokkahópanna. Í tillögunni er lagt til að Norðurlandaráð beini tilmælum til Norrænu ráðherranefndarinnar að skipa sérfræðingahóp, til dæmis með fulltrúum úr háskólum Norðurlanda, til að kanna og móta mismunandi hugmyndir um hvernig norrænt sambandsríki eða ríkjasamband eða mismunandi gerðir nánara svæðisbundins samstarfs gæti litið út og hvernig það gæti starfað með norrænu þjóðþingunum. Tillagan fer nú til umfjöllunar í forsætisnefnd.

Við umræðu um loftslags- og umhverfismál spunnust miklar umræður milli fulltrúa landsdeilda Noregs, Færeyja, Danmerkur og Svíþjóðar um nefndartillögu umhverfis- og náttúruauðlindanefndar um stjórnun á nýtingu sameiginlegra fiskstofna. Fulltrúar Noregsdeilda Norðurlandaráðs voru mótfallnir því við umfjöllun málsins í umhverfis- og náttúruauðlindanefnd og á þingfundi að málið ætti heima á dagskrá ráðsins.

Í tillögunni er lagt til að Norðurlandaráð beini tilmælum til Norrænu ráðherranefndarinnar um að undirbúa og hrinda í framkvæmd aðgerðum í því skyni að bæta skilyrði fyrir sjálfbæra langtímastjórnun sameiginlegra fiskstofna í Norður-Atlantshafi. Í nefndaráli umhverfis- og náttúruauðlindanefndar kom fram að Norðurlandaráð teldi mikilvægt að fundnar verði sjálfbærar langtímalausnir á fiskveiðideilum um makríl og síld, út frá lagalegu

og líffræðilegu sjónarhorni, og að deiluaðilar virtust ekki vera reiðubúnir til að finna nýjar lausnir í þeim efnum. Í nefndarálitinu segir enn fremur: „Umhverfis- og náttúruauðlindanefnd Norðurlandaráðs hefur rætt málið reglulega á fundum sínum. Nefndin byggir mat sitt meðal annars á því að samningur Sameinuðu þjóðanna um úthafsveiðar skuldbindur ríki til að vinna saman að því að tryggja sjálfbæra nýtingu og langtímaverndun fiskstofnanna. Samningurinn segir þó lítið um hvernig hlutaðeigandi lönd eiga að skipta með sér kvóta í fiskstofnum sem eru í sameiginlegri eign. Nefndin byggir mat sitt einnig á því að um er að ræða deilur milli norænna þjóða; Dana sem veiða töluverðan hluta ESB-kvótans, Íslendinga, Færeyinga, Grænlandinga og Norðmanna. Stöðugar og endurteknar fiskveiðideilur geta veikt norrænt samstarf. Nefndin vill benda á að um mikilvægt grundvallarmál er að ræða fyrir Norðurlöndin en það er sjálfbær nýting náttúruauðlinda. Frá því sjónarhorni eru stjórnlausar veiðar ekki ásættanlegar. Nefndin vill einnig geta þess að í Helsingforssamningnum er kveðið á um að samningsaðilar skuli ráðgast hver við annan um sameiginleg hagsmunamál eins og hér eru á ferðinni. Nefndin telur maktíðleikurinn vera til marks um að ýmsu sé ábótavant í umgjörð fiskveiðistjórnunar í NA-Atlantshafi. Fram að þessu hafa fiskveiðisamningar ekki tekið mið af þeim stöðugu breytingum sem eiga sér stað í lífríki hafsins. Hlýnun jarðar örvar væntanlega þær breytingar enn frekar og gerir það að verkum að viðfangsefnum á eftir að fjölga. Nýrrar nálgunar er þörf þegar leitað er sjálfbærra lausna í fiskveiðistjórnun sameiginlegra fiskstofna. Nefndin hefur skilning á því að Norræna ráðherranefndin geti ekki komið að sjálfum sáttaviðræðunum. Nefndin telur þó þörf á samnorrænum aðgerðum sem geti ýtt viðræðunum í rétta átt; hlutlausum vettvangi þar sem fæðast nýjar hugmyndir sem auðveldi deiluaðilum að finna sjálfbærar langtímalausnir. Hugmyndirnar gætu einnig nýst öðrum svæðisbundnum stofnunum, sem fara með stjórnun sameiginlegra fiskistofna, þegar deilur rísa.“

Sigurður Ingi Jóhannsson, sjávarútvegs- og landbúnaðarráðherra, tók þátt í umræðunum um tillöguna, sem hann sagðist telja fína, hún styrkti hinn vísindalega grunn að stjórnun fiskveiða. Hann sagðist hins vegar á því að það muni alltaf koma pólitísk ákvörðun að lokum þar sem það væri ábyrgð stjórnmalamanna að standa frammi fyrir einhverri vísindaniðurstöðu og semja síðan. Tillagan var samþykkt.

Í umfjöllun um samfélags- og heilbrigðismál var til umræðu nefndartillaga menningar- og menntamálanefnd um símenntun. Í tillögunni er lagt til að Norðurlandaráð beini tilmælum til Norrænu ráðherranefndarinnar um að láta gera norræna samanburðarkönnun á því hvort hægt sé að marka norræna stefnu í alhliða endur- og framhaldsmenntunaráætlun, helst í anda alþjóðlegra verkefna á við Individual Learning Accounts (ILA) frá Skotlandi.

Valgerður Gunnarsdóttir var framsögumaður tillögunnar fyrir hönd nefndarinnar. Valgerður sagði í ræðu sinni að mennta- og menningarmálanefnd legði áherslu á að jafnvel þótt ungt fólk hætti í námi eða félli brott úr skóla væri ekki lokað fyrir möguleika þeirra til að koma aftur inn og mennta sig og sérhæfa til mismunandi starfa. Hver einstaklingur væri mikilvægur í atvinnulífinu og samfélaginu og að við hefðum ekki efni á að glata hæfileikum þeirra til að byggja gott samfélag. Valgerður sagði enn fremur að það skipti líka máli fyrir heilbrigði og vellíðan að eiga kost á símenntun því geðræn vandamál og vonleysi fyllti oft fólk sem hætti námi eða félli brott úr skóla og hæfileikar þess glötuðust. Nýjar lausnir væru því mikilvægar, raunhæfar lausnir sem þjónuðu bæði einstaklingum og samfélaginu. Mennta- og menningarmálanefndin liti til Skotlands í þessu tilliti en Skotar hafa þróað með sér símenntunarkerfi sem gerir ráð fyrir að einstaklingar eigi rétt á að afla sér menntunar alla ævi, að sú menntun geti átt sér stað innan atvinnulífsins og að starfsreynsla sé metin til jafns á við nám í skóla. Tillagan var samþykkt.

Í tengslum við þing Norðurlandaráðs voru árleg verðlaun Norðurlandaráðs veitt við hátíðlega athöfn í ráðhúsinu í Stokkhólmi. Verðlaunin eru fimm; bókmenntaverðlaun, tónlistarverðlaun, náttúru- og umhverfisverðlaun, kvikmyndaverðlaun og barna- og unglingabókmenntaverðlaun. Svo bar við að Ísland hreppti tvö verðlaun í þetta skiptið. Benedikt Erlingsson, leikstjóri og handritshöfundur, og Friðrik Þór Friðriksson framleiðandi hlutu

kvikmyndaverðlaunin fyrir myndina Hross í oss og Reykjavíkurborg hlaut náttúru- og umhverfisverðlaunin fyrir umhverfisstarf og umhverfisvæna nýtingu neysluvatns og framleiðslu fjarvarma og rafmagns með aðstoð jarðhita. Þá hlaut finnski rithöfundurinn Kjell Westö bókmenntaverðlaunin fyrir skáldsöguna Hägring 38, Håkon Øvreås og Øyvind Torseter frá Noregi barna- og unglingabókmenntaverðlaunin fyrir bókina Brune og danska tónskáldið Simon Steen-Andersen tónlistarverðlaunin fyrir verkið Black Box Music.

Sænska ríkissjónvarpið tók upp verðlaunaafhendinguna og sýndi sérstakan þátt með viðtölum við verðlaunahafana og svipmyndum frá athöfninni tveimur dögum síðar. Þátturinn, sem fékk heitið Úrval Norðurlanda (s. Nordens bästa), var einnig sýndur á norrænu ríkissjónvarpsstöðvunum dagana í kjölfarið.

Í lok Norðurlandaráðsþings var kosið í nefndir og embætti ráðsins fyrir næsta ár. Nefndarseta fulltrúa Íslandsdeildar Norðurlandaráðs verður með þeim hætti árið 2015 að Höskuldur Þórhallsson og Guðbjartur Hannesson verða í forsætisnefnd, Valgerður Gunnarsdóttir í menningar- og menntamálanefnd og eftirlitsnefnd, Elín Hirst í borgara- og neytendanefnd, Róbert Marshall í umhverfis- og náttúruauðlindanefnd, Steingrímur J. Sigfússon í efnahags- og viðskiptanefnd og kjörnefnd og Jóhanna María Sigmundsdóttir í velferðarnefnd.

Íslendingar fara með formennsku í Norðurlandaráði á næsta ári. Tveir sóttust eftir embætti forseta fyrir árið 2015, Höskuldur Þórhallsson og Steingrímur J. Sigfússon. Samkvæmt starfsreglum Norðurlandaráðs tilnefna landsdeildir frambjóðendur til forseta og varaforseta og hefð er fyrir því að kjörnefnd Norðurlandaráðs fylgi tilnefningu landsdeilda og geri tillögu um það til þingfundar sem kýs í embættin. Íslandsdeild Norðurlandaráðs tilnefndi samkvæmt meirihlutaákvörðun Höskuld Þórhallsson til forseta og Guðbjart Hannesson til varaforseta eftir atkvæðagreiðslu á fundi nefndarinnar þar sem tillögur voru gerðar um að tilnefna til forseta Höskuld annars vegar og Steingrím hins vegar. Höskuldur hlaut 5 atkvæði og Steingrímur 2 atkvæði. Kjörnefnd Norðurlandaráðs fylgdi tilnefningunni og gerði tillögu um Höskuld og Guðbjart til þingfundar. Þingflokkur vinstri-sósíalista og grænna kallaði eftir atkvæðagreiðslu á þingfundinum milli Höskuldar og Steingríms með þeim rökum að tímabært væri að forseti ráðsins kæmi úr röðum flokkahóps vinstri-sósíalista og grænna þar sem 12 ár væru liðin frá því að það hefði gerst síðast og flokkahópurinn ætti tæplega 10% fulltrúa í ráðinu. Á fundi kjörnefndar og á þingfundi var ítrekað að tilnefning til forseta væri á forræði landsdeilda. Gengið var til atkvæða á þingfundinum í fyrsta skipti um embætti forseta og fór atkvæðagreiðslan þannig að Höskuldur fékk 52 atkvæði og Steingrímur 9. Guðbjartur Hannesson var kosinn varaforseti.

Eftir kjörið tók Höskuldur Þórhallsson til máls og þakkaði það traust sem honum og Guðbjarti Hannessyni væri sýnt. Höskuldur reifaði í megindráttum formennskuáætlun Íslands í Norðurlandaráði á næsta ári sem hefði þrjú áherslusvið. Í fyrsta lagi alþjóðlegt samfélag sem fjallaði um utanríkis-, öryggis- og varnarmál, norðurslóðir, verslun, Vestur-Norðurlönd og grænna í vestri. Í öðru lagi velferðarsamfélag sem fjallaði um eftirfylgni Könberg-skýrslunnar og lýðheilsu. Í þriðja lagi borgaralegt samfélag sem fjallaði um norræn frjáls félagasamtök og stjórnsýsluhindranir. Að lokum þakkaði Höskuldur sænsku landsdeildinni, forseta Norðurlandaráðs, Hans Wallmark, og varaforseta, Phiu Anderson, og skrifstofu sænsku landsdeildarinnar og skrifstofu Norðurlandaráðs fyrir mjög vel heppnað Norðurlandaráðsþing í Stokkhólmi og bauð þátttakendur velkomna að ári til Norðurlandaráðsþings í Reykjavík.

Á næsta ári fer vorþingfundur Norðurlandaráðs með sérstaka áherslu á verslun fram dagana 25.–27. mars í Brussel og aðalþingfundur ráðsins verður 26.–29. október í Reykjavík.

Frekari upplýsingar má nálgast hjá ritara Íslandsdeildar og á vefsvæðinu www.norden.org.